

M115: Baumgartenberger Johannes Baptista

- 0,1 Die toten hiez er uf stan .
0,2 die miselsuht hier er ab gan .
0,3 die da lagen an der uergihite .
0,4 wie drate er si uf rhite .
0,5 dem blinden er daz lihet gap .
0,6 neheiner miete er ne flach .
0,7 die gebunden zungen .
0,8 die zeloste er dem stummen .
0,9 diu touben oren er ensloz .
0,10 da wart deu ureude uil groz .
0,11 des heiligen mannes .
0,12 des guten sante iohannes .
0,13 Die wissagen do uor sageten .
0,14 also si uernomen habte .
0,15 uon dem heiligem geiste .
0,16 der bewiste si der liste .
0,17 da si die iuden mite lerten .
0,18 daz si sich becherten .
0,19 unze an sante iohannes cit .
0,20 do wart ein michel strit .
0,21 wie si die ebereischen e .
0,22 solden uersten .
0,23 also geistlichen .
0,24 daz begunde in harte misselichen .
0,25 Do wolden si moysen lesen .
0,26 mit ime wolden si genesen .
0,27 moyses der gehiez in ertriche .
0,28 iohannes der gehiez in daz himelriche .
0,29 moyses der gebot in daz si an ir uianden naemen den sigenust .
0,30 iohannes zeigte in die gotes chust .
0,31 moyses der riet in daz si an ir uiande rache naemen .
0,32 iohannes der riet in daz si ir uiande uergaeben .
0,33 moyses der riet in daz |s,i sich besniten .
0,34 nach ebreischem site .
0,35 iohannes der riet in daz sich touften .
0,36 unde an den geloupten .
0,37 der allez manchunne
0,38 uon der helle gewnne .

0,39 Der strit was so lange .
0,40 des mhate do harte baelangen .
0,41 die do da waren .
0,42 daz sag ich ze ware .
0,43 der gvte sante iohannes den sich nam .
0,44 ime uolgte manc wip unde man .
0,45 Nu wil ich eu sagen aue sa .
0,46 uon sancto iohanne baptista .
0,47 eines tages do stunt er aue da .
0,48 da unser herre selbe uur gie
0,49 niht langer er ne lie .
0,50 er wincte in mit dem uinger .
0,51 er sprach zu sinen iungeren .
0,52 die da sazen unde stunden .
0,53 er sprach “nu sehet ir herren gvte .
0,54 dize ist daz gotes lamp .
0,55 uil michel ist der sin gewant .
0,56 daz unser burde sol tragen .
0,57 ze ware ich iz eu sage .
0,58 sin uater hat iz her gesant .
0,59 in dize ellente lant
0,60 in dize zehere tal .
0,61 durc adames ual .
0,62 durc unser blode unde unser wenicheit .
0,63 iz ist dem tieuel uil leit .
0,64 zu ime hat er neheine minne
0,65 er truwet im her nahc grozen scaden gewinnen .”
0,66 Do unser herre .
0,67 begunde selbe bredegen unde leren .
0,68 sine holden in do baten .
0,69 daz er in chunt taete .
0,70 umbe den herren elia-
0,71 des antwrte er in uil fram .
0,72 er sprach “nu uernemet daz war ist .
0,73 elias chomen ist
0,74 die lute sin niht erchanten
0,75 wie harte si in do schanten”
0,76 min trhetin sprach in aue zu
0,77 “ir schult iz rhete [...] [...]”